

interview met.....

Jubileum: 50 jaor rapido >> Jubileumjaar



Stel dich efkes veur.....

Vruuger hoot ik Corry van Heukelom en umdet ik al 33 jaor getrouwde bin met Hub Sweijen heit ik al jaore Corry Sweijen - van Heukelom. Weej woëne vanaaf 1975 in Maasbree en we hebbe 2 zeuns: Ties en Joep. De jonges zien de deur oét en woëne in Tilburg en Den Haag.

Ik zoel gaer weer in Venlo wille woëne, maar Hub wilt neet met mich mei.

Messchien môt ik zegge "wilt nóg neet met mich mei naor Venlo".

Wie kin ik um op andere gedachte bringe..... dao heb ik nog gen oplossing veur, tips zien altièd welkôm.

In Venlo kin ik ens efkes op de fiets naor mien zuskes of breurs veur un teske kôffie en de kins ens gauw efkes de stad in um te sjoppe.

Vanôet Maasbree bisse meistal op den auto of de bus aangeweze, 't is neet altièd fietswaer.

Wannièr waasse lid van Rapido en wielang bisse det gewaes.

Ik dink det ik 10 jaor lid bin gewaes van Rapido van 1967 tot 1977, weej speulde toen in de Laurentiuskerk .

Ut plafôn waar in de kerk hoëger dan in 'n normale sportzaal en leep spits toe in 't midde.

Beej kompetitiewedstrijde kósse de taegestander dan met unne hoëge serve op 't verkièrde bein zette.

Waas 't nog leuk naó Rapido.

Op sportief gebied waas 't zeker nog leuk naó Rapido en auk aafwisselend.

Ik bin nao Rapido in Maasbree 15 jaor lid gewaes van de badmintonclub, det waar waat minder "eige" dan Rapido maar aevegood gezellig.

Ônverstelbaar eigelik!

Ik bin al vreej jongk met handballe begônné en heb nog lang beej HV Bliérick beej de veter(inne) gespeuld en aan vuul toernooie meigedaon, hiël gezellig.

We hebbe nog altièd ônderling kontak en we treffe ôs geregeld.

Vaerder heb ik nog getennis tot mien 50e maar toen kwaam d'r langzaam de sleet in jaomer genôg.

De letste 10 jaor doon ik nik's mièr aan sport, waat erg taegeveldt asse jaore gewind bis hiël vuul aan sport te doon.

In 't begin had ik 't d'r erg moeilik mei en kós d'r slech mei um gaon, noow geit 't iets baeter.

Waat is de leukste of vervaelendste herinnering die se hebs oét diene Rapidotied.

De droppings oét mien beginjaore beej Rapido



Handbalfanaat

vônd ik erg leuk.

We woorte in unne geblindeerde vrachwage ôrges in de bös gedrop.

We meuste in 't duuster de waeg truuks zeen te vinden met wat aanwiëzinge,
'n zaklamp en 'n noëdenvelop veur asse 't ech nimmer wis.

Hadse die noëdenvelop aope gemak dan kosde dich det netuurlik 'n aantal strafpunte.

Ik kin mich auk 'n wiekend naor de Ardennen herinnere, veur Hub de ièrste kièr dette met Rapido 'n paar daag meiking.

Daonao is hae aan mich bliève hange of ik aan um, det weit ik neet mièr.

Messchien haet Rapido dao waal 'n rol in gespeuld, det heb ik um eigelik noëts gevraog.

Op de zomer-äövendjes beej de blokhut in Grubbevors hebbe we altièd vuel gezonge en gelache rônd 't kampveur.

Volges mich waar 't meistal good waer, erg gezellig en 't woord altièd behuurlik laat of vruùg, net wie se 't bekieks.

Ik heb gen vervaelende herinneringe aan Rapido of ik bin ze vergaete.

'n Selectief geheuge kin waal ens hendig zien.

Welke sport duisse noow en waat zien dien hobby's.

Sport is veur mich verleeje tièd umdet ik euveral las heb van sleitage, jaomer genôg. Aaf en toe wandel ik 'n eurke, maar neet vuël langer.

Fietse geit gelökkig nog prima en in de zomerperiode bin ik dan auch geregeld met de fiets op paad.

Met mien andere hobby's kin ik vuël kómpenseere zoëas met bridge, det erg leuk is um te doon.

Ik speul eine kièr in de waek in clubverband en eine kièr in de waek met 'n vas gruupke.

'n Gooje meneer um de baouvekamer actief te halde, dao is beslis niks mis mei.

'n Andere leuke hobby is met glaas in loëd werke.

Weej volge met 'n aantal minse unne cursus in Velden beej unne vakman, det is dök intensief werke maar erg leuk um te doon.

Vaerder werk ik al diek 3 jaor as vrijwilligster in Bliérick in de Tollenstraot met demente bejaarde.

Ik bin d'r beej toeval in gerold en ik wis neet det mich det zoë good aaf ging, 't had mien werk kinne zien.

We zien met 'n leuk stel vrijwilligers en probere de minse creatief bezig te halde.

't Guf dich unne kick en vuul voldooning asse zuus det de minse dao bliej van waere.

Geisse gaer op vakantie en welke plek haet dien veurkeur.

Hub en ik gaon gaer op vakantie maar neet te wièd.

Veural de zië trek mich, de ziëlôch, 't strand, de sfeer, alles eigelik.

We gaon auch gaer naor Friesland en Drente met eur aafwisselend landschap, dao kinne lekker fietse en de hes volop de ruumte.

Terrasje pikke en geneete, Nederland is zoë gek nog neet!

Vrinde van ôs zette dan örger eure caravan neer en weej kinne dao zoëlang gebroék van make.



Op welke plek môsse volges dich eine kièr in dien laeve gewaes zien.

Op de top van de Kilimanjaro en dae is 5896 maeter.

Nae det is gen geintje, dao heb ik baovenop gestaon!

'n Prachtige herinnering oët de jaore toen mien conditie nog top waar.

Ik heb 2½ jaor in Kenia gewerk en heb in 1973 van daoroët met 'n gruupe van 8 persoëne en 2 gidse de Kilimanjaro bekłomme.

In 4 daag naor baove en in 3 daag naor onder, 'n belaevenis.

Ik laefde in Kenia op 2000 maeter huëgte en waar al aardig gewind aan de dunnere lôch.

Ik waar toen 27 jaor en had 'n top konditie door 't vuul sporte.

We hebbé maar met 2 man de top gehaold en dao waar ik beej!

De meiste krege de huëgteziekte, dan hesse weinig mièr te wille, de veuls dich krank.

Beej de letste 100 maeter kreeg ik behuurlik koppien en dan wilse auk snel weer dale.

De Kilimanjaro is unne krater en de tóch daonao toe is neet steil maar vals plat, dus gestaag klumme.

De zaks telkes weg in 't fiene gruus waat d'r leet en det mak 't zwaor.

Ik bin d'r auk geweldig trots op det ik die kans toen heb gegrepe.



Op waeg naor de top van de Kilimanjaro

Met wae zoelse unne kièr 'n beschuitje wille aete en waorum.

Ik zoel ens gaer 'n beschuitje wille aete of 'n buimpke opzette met unne prominente nederlandse politicus b.v. Balkenende. Noow is Jan-Peter gaar gen "stök" maar um te weite te kômme wie 't is um 'n land te bestuure hoof det auk neet.

Ik zoel um vraoge: wie geisse met det nederlands gezanik um, wie laefse dan. Hebse waal 'n gezinslaeve en kinse dan nog örges ôntspanne 'n pilske of wienke gaon drinke met dien vrinde en lekker zát waere.

Ik zoel Jan-Peter waal ens zat wille zeen trouwes.

Maar laot ôs iérlik zien, wannièr duisse 't in Nederland good.

't Is of te kort of te langk, te diek of te dun, altièd is d'r waat te zanike.

Ik bin erg in politiek geïnteresseerd, eigelik van vruuger oët al.

Mien mooder waar eure tièd veuroët, 'n zoëgenaamde roëje vrouw en mien vader waar vakbôndsman.

Beej ôs thoës woord geregeld euver politiek gepraot aan taofel, met 8 kinder kriègse dan vanzelf leuke discussies.

Mien 2 zeuns zien allebei politiek aktief, maar we praote auk euver andere onderwerpe huer.

Wao hebse unne groëte haekel aan.

Ik heb unne haekel aan zanikers die zelf alles good doon en alles 't beste weite, idderein kint waal zoë emus.

Ik zoot letsan beej den dokter en unne man van 'n jaor of 40 deej in de volle wachkamer zien beklaag euver diverse dokters en specialiste.

Hae woel zelfs ziene baas aanklage want hae had
nao 4 waeke ziek zien rech op ein fruitmand.
Wat waar 't geval, hae zoot al 2 maond thoës en
had nog steeds gën fruitmand gekrege.
Wat waas det unne waus, wat zuk zoë emus
beej unne dokter asse toch alles baeter wits.

Hebs dich 'n laevesmotto en waat is det.

Mien laevesmotto is: Gewoën doon en gewoën
doon.



Waat goof dich tot noow toe de grutste kick.

Mien vertrek naor Afrika via de stichting
Nederlandse Vrijwilligers.

In 1972 bin ik veur 2½ jaor in Kenia gaon
werke in ein klein streekziekehoës as analiste.

Toen ware d'r nog gen lap-tops, e-mail, chat of web-cam meugelikhede.
De meus 't zelfs zônder mobieljtje doon en det ging allemaol.

Ik kós vanoët Machakos allein breeve schriève en hiël aaf en toe belle dat ware de
kóntakte.

Ik kreeg de wuëning toegeweze van de vurrige vrijwilligster en die had 2 minse in
deens.

Eine deej 't graas snieje met ein langk mets (un soort kleine zeis) en vaerder had
dae 't drök met kleppe de gansen daag.

Den andere deej hiël vuul in hoës, veural elken daag de leeme vloer poetse.
Hae deej zelfs mien was, maar mien ôndergood det meus ik zelf wasse.

Eigelik woel ik leever álles zelf doon maar det waar eur enige inkômme, dus heb ik 't
maar zoë gelaote.

Ik heb waal zelf gekaok anders veulde ik mich net unne VIP en det pás neet beej
mich.


Miene Afrikaanse vrind is in die periode met ziene
motor verôngelök.....det waar 'n heftige
periode.

'n Paar kièr per jaor meuste weej ôs melde
veur 'n vergadering of unne sportdaag beej 't
haufkantoër in Nairobi.

Ik heb nog steeds kóntak met verschillende
andere vrijwilligers die toendertièd in Afrika
werkde.

Eine in Australië en 'n echpaar oët Amerika en
dan nog de kóntakte in Nederland her en der.
Elke 5 jaor hebbe we 'n reünie en det is
hartstikke leuk.

De kins det Afrika-geveul allein deile met minse
die dao auk gelaef hebbe, veur andere is det neet



oèt te legge.

Ik heb in die 2½ jaor vuël geliërd, veural gedöld hebbe.

Alles ging op zien elf en dertigs. Ze kwame gen 5 minute te laat maar unnen halven daag, det waar dao gans gewoën.

'n Ônvergaetlike periode in mien laeve wao ik geliërd heb mich aan te passe in allerhande umstandighede.

Hebse nog iets op te biechte, doot det dan noow.

Biechte heb ik altièd allein wille doon beej Pater Ananias, 't pielpaeterke en dae laef neet mièr.

Hae vroog noëts vuël en zoot half te sloope in de biechstool.

Nao waat gemômpel kreegse vreej snel de zaegen en as penitentie maar un paar Wees-Gegroetjes en éin Ônze Vader.

Jao det biechte hâd waal wat, waat zulle die priëmers dök gelache hebbe in dae biechstool.

Waoreuver wilse nog waat kwièt.

Ik heb 'n stage-tip veur de minse van diverse opleidinge.


Laot de jeug ens sociale stage laupe in 'n ôntwikkelingsland en beej veurkeur op 't platteland.

Netuurlik zônder computer en mobielte, ik dink det ze binne un paar waeke unnen haup wiézer waere en zich good liëre aanpasse.

't Is netuurlik waat deurder dan 'n stage heej in Nederland

maar via 'n loëting zoel det messchien te verwezelikke zien veur 'n aantal serieuze studente.

Elly van Elswijk



Veur ut ziekehoës

